

Gospodine predsjedavajući, gospodo vijećnici,
poštovane dame i gospodo, uvaženi uzvanici,
dragi gosti, dragi sugrađani,
uvaženi predstavnici medija,

1.

Čast mi je da vas u ime organa uprave općine Doboj Jug i u svoje ime mogu najsrdačnije selamiti i pozdraviti uz zahvalnost što ste se odazvali našem pozivu da zajedno, skromno i svečano obilježimo današnji dan, naš najveći općinski praznik- Dan općine Doboj Jug i njenu Devetnaestu godišnjicu uspješnog trajanja i postojanja.

Moram naglasiti da ćemo se uvijek u ovakvim prilikama podsjećati nekih, nama značajnih i povjesnih činjenice vezanih za našu općinu. Prije svega dopustite mi da javno izrazim zahvalnost našim građanima i borcima Armije Republike Bosne i Hercegovine što su nam u periodu 1992-1995.godine, odbranivši ovaj kraj, stvorili pretpostavke da imamo Doboj Jug kao lokalnu zajednicu. U ime građana Doboj Juga zahvaljujem se svim subjektima i svima nima koje su na bilo koji način pomagali od 1998.godine pa do sada, da Općina Doboj Jug bude ono što jeste danas, a to je sredina u kojoj se poslije nesretnog rata i trenutnih teškoća prisutnih zbog ekonomske i ozbiljne političke krize u zemlji, mučnog oporavka od majskih poplava iz 2014.godine i dubioze zatečene od prethodne lokalne vlasti, ovdje ipak ponešto dešava uz inat nekima koji to sve negiraju i omalovažavaju.

Općina ima trend razvoja. Želimo imati Doboj Jug kao mjesto ugodnog življenja i izazovno mjesto za privređivanje, posebno da bude izazov za mlade, kao što to stoji u našoj viziji razvoja do 2020.godine. Želimo uspješno graditi dobre odnose unutar lokalne zajednice, unutar Općinskog vijeća u kojem Koalicija političkih partija dobro funkcioniše. Želimo takođe imati stalnu konekciju sa višim nivoima vlasti, imati uspješnu saradnju sa susjednim općinama, sa međunarodnom zajednicom, sa bratskom općinom Sindžan, i ako bogda drugim bratskim općinama, stalnu saradnju sa našim cjenjenim donatorima, sa našom dijasporom i sa svima drugima koji nas podržavaju u našem razvoju, a kojima se od srca zahvaljujem.

Dame i gospodo,

I u ovakvim složenim privrednim i još složenijim političkim prilikama, zbog zatečenog duga iz prethodnog mandata smijem se usuditi i kazati da nam je stanje u općini ipak podnošljivo. Moja prva zadaća je bila, a nakon skeniranja zatečenog stanja da se poduzmu mjere na konsolidaciji budžeta i da se

projektima, u punom kapacitetu nametnemo partnerima i višim nivoima vlasti da nas podrže. Svakodnevno smo na tom fonu, ostvarujemo stalnu komunikaciju sa resornim ministarstvima, domaćim i međunarodnim organizacijama kako bi u njima našli istinske partnere. Shvatajući prilike u kojima se nalazimo i mi i društvo u cjelini, Odlukama općinskog vijeća nastojimo stvarati poslovni ambijent na našem prostoru za naših više od dvjesto privrednih subjekata koji su imali viziju i hrabrost ući u poduzetničku aktivnost i bili sposobni stvoriti i osigurati više od hiljaditrista radnih mjesta sa tendencijom njihovog povećanja. Imamo i takve firme na ovom prostoru koje su, ne samo brend Doboja, već i Države Bosne i Hercegovine. Stalno komuniciramo sa našim poslodavcima, kako bi čuli i njihova razmišljanja, ali i brojne primjedbe kada su u pitanju sistemska rješenja sa kojima se svakodnevno susreću. Ovih dana bićemo domaćini malte-ne kompletnom sastavu Vlade našeg kantona na čelu sa premijerom Miralemom Galijaševićem, gdje ćemo Vladu kantona na licu mjesta upoznati sa prilikama i neprilikama sa kojima se svakodnevno susrećemo. Poziv potencijalno novim subjektima za nova ulaganja je ovdje stalno otvoren. Nudimo im šansu u skladu sa Strategijom ravoja, vrlo značajnim planskim dokumentom koji nam je u tome glavna vodilja. Otvaranje svakog novog radnog mjesta je za pozdraviti.

Nije vrijeme velikih govora, jer je proteklo samo par mjeseci moga mandata, ali se moram osvrnuti na ono što smo do sada uradili. Ispoštovali smo budžetski kalendar i na vrijeme usvojili naš budžet koji iznosi nešto više od 2,2 miliona maraka. Izvršili smo finansijsku stabilizaciju zatečene budžetske dubioze rješavanjem nagomilanih problema kao što su brojne tužbe i tu smo stavili tačku. Okončana je agonija oko kupovine nekretnine na Karušama, potpisali smo sporazum i krenuli sa isplata obaveza po tom osnovu. Izvršili smo popravku kanalizacione mreže kod gornje džamije u Matuzićima i na taj način otklonili veliki problem koji je otežavao život građanima. U saradnji sa Kantonalnom upravom Civilne zaštite ZDK sanirali smo jedno klizište u Mravićima zašto je utrošeno 40.000 maraka i time zaustavili daljnju prijetnju za nastanak šteta kod građana u ovom dijelu općine. Zahvaljujući Federalnom Fondu solidarnosti okončali smo podjelu 50.000 maraka za poplavljene iz majskih poplava 2014. godine. Nastavili smo aktivnosti na projektima kanalizacije, vodosnabdijevanja, uređenja platoa kod tenkova na Karušama, Izletišta „Matoševe dubrave“, na stipendiranju studenata i pružanju pomoći nadarenim osnovcima i srednjoškolcima, na pružanju raznovrsne pomoći socijalno osjetljivim kategorijama, na uspostavi čvrših veza sa bratskom Općinom Sindžan iz Turske, potpisali jako bitan dokument za ovu zemlju,

Povelju mira sa CRS-om, a u sferi društvene nadgradnje imamo stalnu komunikaciju sa našim nevladinim sektorom, sa Medžlisom Islamske zajednice i našim džematima ,jer nam je jako stalo da se na prostoru općine osjeti društveni aktivizam.

Sama činjenica da ove godine imamo dvadesetjedan događaj manifestacionog karaktera kojim obilježavamo naše "Martovske svečanosti" potvrda je toga. Već za dva dana ovdje ćemo imati TRIBINU na vrlo aktuelnu temu koja opterećuje naše građane, a ona glasi: "Monitoring vodenog potencijala rijeke Usore u okviru ekološke sigurnosti" o čemu će svoja naučna istraživanja iznijeti eminentni ljudi iz ove oblasti.

U danima pred nama moraćemo razriješiti pitanje za jako zahtjevni projekat „Izgradnje prečištača otpadnih voda“, nastaviti sa jačanjem Industrijskih zona kroz promocije privrednih potencijala, otpočeti sa realizacijom Projekta Spomen-parka na Karušama, razriješiti pitanje smještaja nekoliko društvenih institucija, pitanje adaptacije, uređenja i dovođenja u funkciju objekta Doma u Mravićima, tragati za rješenjem fudbalskog igrališta, odnosno funkcionalne sportske dvorane, pokrenućemo Općinsku biblioteku, raditi na uređenju okoliša, a posebno zapuštenih obala naših rijeka, na uređenju harema uz Kuvajtsku džamiju, kadrovski i materijalno osposobiti Dobrovoljno vatrogasno društvo, urediti i ojačati naše Mjesne zajednice, naše JKP "VIS"... Puno je izazova, ali se iskreno nadamo da ćemo uz pomoć viših nivoa vlasti, donatora i prijatelja naše planove pretvoriti u realnost. Ovo su investicije koje su izvjesne, kao što je izvjesno da će se i budući koridor 5-C naslanjati na naš kraj, a paralelno sa ovom investicijom radiće se vrlo zahtjevan projekat uređenja korita r. Usore i zaštita od plavljenja.

Naš glavni resurs jeste naš geografski položaj, naša preduzimljivost i poslovnost, naši privredni subjekti, jer bez njih i bez zajedničkih napora poduzetnika, predstavničke i izvršne vlasti nema rezultata.

Ipak, svi mi u izvršnoj, predstavničkoj i zakonodavnoj vlasti, uključujući i korisnike budžeta trebamo se prilagoditi ukupnim prilikama u ostvarivanju budžeta i prilagoditi svoju potrošnju očekivanim prihodima, pa i na ovaj način poručujem svim budžetskim korisnicima na domaćinski odnos i na jedno veliko razumijevanje kroz maksimalnu primjenu mjera štednje.

Mi smo navikli da nam općina bude jedno veliko gradilište i sa ovog mjesta naglašavam da jeste i da će u narednim danima biti ,jer moramo stvarati uslove za rad i zapošljavanje mladih koji će ostajati ovdje, a ne tražiti nafaku po bijelom svijetu. Hoćemo da nam svaki građanin bude zadovoljan, a naša obaveza i jeste da im stvaramo ambijent dobrog života.

Ja i moji saradnici ćemo nastaviti iznalaženje najboljih rješenja, tragaćemo za sredstvima putem projekata nebi li se nametnuli drugima, našim vladama, resornim ministarstvima, međunarodnoj zajednici i donatorima, tražeći u njima istinske partnere čija bi nam podrška bila itekako važna. Za sve to trebaće mnogo znanja, mudrosti, strpljenja, više napora, razumijevanja, fleksibilnosti, međusobnih razgovora i uvažavanja svih političkih aktera, hrabrosti i sposobnosti svih ljudi koji se bave važnim poslovima.

Poštovani sugrađani, dragi gosti, uvaženi vijećnici i prijatelji...

Ovo je samo mali dio realne slike Doboja Juga. Želim vjerovati da ćemo sve probleme koji su evidentni u raznim oblastima zajednički i uspješno prevazilaziti.

Na kraju svim sugrađanima naše općine upućujem iskrene čestitke za Dan općine, upravi, nastavnicima i učenicima Osnovne škole čestitam 21. mart-njihov dan škole. Želim svima nama mnogo zdravlja, ličnu i porodičnu sreću i mnogo uspjeha na svim životnim poljima rada i djelovanja uz poruku da nećemo moći promijeniti ništa, ako ne promijenimo sebe.

Hvala vam lijepo! Zdravi i živi bili.